

PRAVILNIK O DISCIPLINSKOJ I MATERIJALNOJ ODGOVORNOSTI STUDENATA *

I OPĆE ODREDBE

Član 1.

Ovim Pravilnikom uređuje se disciplinska i materijalna odgovornost studenata Univerziteta u Novom Pazaru (u daljem tekstu: Univerzitet), utvrđuju se obaveze studenata, lakše i teže disciplinske povrede, disciplinske mjere, nadležni disciplinski organi i pravila disciplinskog postupka u kojem se odlučuje o postojanju disciplinske povrede i izricanju disciplinske mjere.

Član 2.

Student Univerziteta dužan je pridržavati se propisa utvrđenih Zakonom o visokom obrazovanju, statutom, općim aktima i ugovorom o studiranju Univerziteta i departmana u sastavu Univerziteta, čuvati ugled i poštovati prava zaposlenih i studenata na Univerzitetu i departmana na kojem studira, poštovati propisanu disciplinu i uobičajena pravila ponašanja u okviru univerzitetske akademske zajednice i uredno izvršavati svoje obaveze.

Student odgovara za disciplinsku povredu koja je u vrijeme izvršenja bila predviđena ovim Pravilnikom.

Student odgovara i materijalno za štetu koju namjerno ili iz krajnje nepažnje prouzrokuje Univerzitetu.

Član 3.

Krivična, odnosno prekršajna odgovornost, ne isključuje disciplinsko kažnjavanje za isto djelo koje je predmet krivičnog, odnosno prekršajnog postupka.

II DISCIPLINSKE POVREDE

Član 4.

Disciplinska povreda je ona povreda koja je Pravilnikom predviđena kao disciplinska povreda, koja predstavlja povredu odredaba o obavezama studenta i koja je učinjena s namjerom ili krajnjom nepažnjom.

Član 5.

Disciplinska povreda studenta može biti lakša i teža.

Član 6.

Lakšom disciplinskom povredom smatra se:

- 1) kršenje reda na predavanjima, vježbama, ispitima i drugim oblicima nastave, koje nije predviđeno kao teža disciplinska povreda;
- 2) namjerno nanošenje materijalne štete imovini Univerziteta, ukoliko šteta ne prelazi novčanu vrijednost od 25.000 din;
- 3) izražavanje nepoštovanja nastavnicima, saradnicima i drugim zaposlenima, studentima kao i gostima Univerziteta;
- 4) nepridržavanje propisa o zaštiti na radu;
- 5) nepridržavanje pravila iz Kodeksa ponašanja i oblačenja nastavnog osoblja i studenata na Univerzitetu u Novom Pazaru.

Član 7.

Težom disciplinskom povredom smatra se:

- 1) korišćenje nedozvoljenih sredstava na ispitu i polaganje ispita protivno utvrđenim pravilima studija;
- 2) polaganje ispita umjesto drugog;
- 3) prepravka i upisivanje podataka u javnu ispravu koju izdaje Univerzitet ili njihovo korišćenje;
- 4) prepravka ili dopisivanje podataka u evidencije koje vodi Univerzitet ili njihovo korišćenje;
- 5) krađa imovine Univerziteta ili imovine zaposlenih i studenata;
- 6) izazivanje tuče ili učestvovanje u tuči u prostorijama Univerziteta ili u dvorištu, kao i izazivanje nereda na tim mjestima;
- 7) širenje nacionalne, vjerske, rasne i druge netrpeljivosti;
- 8) namjerno ugrožavanje sigurnosti nepridržavanjem propisa o zaštiti na radu;
- 9) navođenje na upotrebu alkohola ili opojnih droga ili davanje ili pomaganje u upotrebi alkohola ili opojnih droga ili upotreba tih sredstava u prostorijama Univerziteta;
- 10) dolazak studenta na nastavu, ispite i na Univerzitet u vidno alkoholiziranom stanju ili pod djelovanjem opojnih droga;
- 11) namjerno nanošenje materijalne štete imovini Univerziteta, ukoliko šteta prelazi novčanu vrijednost od 25.000 din;
- 12) političko, stranačko i vjersko organiziranje i djelovanje u prostorijama Univerziteta;
- 13) sprečavanje održavanja nastave na Univerzitetu;
- 14) neovlašćeno umnožavanje materijala za pripremanje ispita radi stavljanja u promet i sticanja materijalne dobiti;
- 15) neovlašćeno korišćenje sredstava Računarskog centra, laboratorija i drugih organizacionih jedinica Univerziteta;
- 16) iznošenje i širenje neistinitih tvrdnji kojima se nanosi šteta Univerzitetu putem sredstava javnog informiranja, društvenih mreža ili na javnim skupovima;
- 17) težom povredom smatra se dva puta ponovljena lakša povreda;
- 18) druge aktivnosti koje nisu navedene, a predviđene su kao kažnjive drugim propisima ili općim aktima Univerziteta, a koje Disciplinska komisija ocijeni kao težu disciplinsku povredu.

III DISCIPLINSKE MJERE

Član 8.

Za lakšu disciplinsku povredu studentu se mogu izreći disciplinske mjere:

1. opomena ili
2. ukor.

Za težu disciplinsku povredu studentu se mogu izreći disciplinske mjere:

1. Zabrana polaganja predispitnih i ispitnih obaveza i ispita iz predmeta na kojem je povreda obaveze učinjena, u dva ispitna roka;
2. Zabrana polaganja svih predispitnih obaveza i ispita u dva ispitna roka;
3. Zabrana polaganja svih predispitnih obaveza i ispita u četiri ispitna roka ili
4. Isključenje s Univerziteta.

Disciplinska mjera isključenja sa studija na visokoškolskoj ustanovi može se izreći istom studentu neodređen broj puta, ali pri ponovnom izricanju ove mjere istom studentu ona ne može biti izrečena u kraćem trajanju nego u prethodno izrečenom trajanju.

Disciplinska mjera isključenja sa studija na visokoškolskoj ustanovi sastoji se u obustavi prava studenta, u periodu trajanja na koji je izrečena, odnosno u nemogućnosti studenta da učestvuje u oblicima provjere znanja i da preduzima bilo kakve administrativno-pravne radnje u vezi sa reguliranjem svog studentskog statusa.

Period trajanja isključenja sa studija na visokoškolskoj ustanovi, računa se prema kalendarskoj godini, počev od dana konačnosti odluke o izricanju disciplinske mjere.

Kod odmjeravanja disciplinske mjere, disciplinski organ će u svakom pojedinačnom slučaju cijeniti težinu povrede obaveze, kao i sve okolnosti vezane za učinjenu povredu i studenta kao počinioce.

Sva nedozvoljena sredstva koja je student koristio prilikom polaganja ispita oduzimaju se do konačnog okončanja disciplinskog postupka.

IV DISCIPLINSKI ORGANI

Član 9.

Organi za utvrđivanje disciplinske povrede, izricanje disciplinskih mjera i naknade materijalne štete su:

1. Disciplinska komisija u prvom stepenu,
2. Senat Univerziteta u drugom stepenu.

Senat Univerziteta odlučuje po žalbi na prvostepenu odluku Disciplinske komisije.

V DISCIPLINSKI POSTUPAK

Član 10.

Disciplinski postupak protiv studenta za disciplinsku povredu i naknadu materijalne štete vodi i odluke donosi Disciplinska komisija.

Disciplinska komisija ima tri člana, dva imenuje rektor iz reda nastavnika Univerziteta, od kojih je jedan predsjednik, na period od 3 godine, a jednog iz reda studenata bira Studentski parlament na period od godinu dana.

Član 11.

Disciplinski postupak se pokreće na osnovu prijave nastavnika, saradnika, studenta, Studentskog parlamenta, odnosno zaposlenog na Univerzitetu.

Disciplinski postupak može se pokrenuti u roku od tri mjeseca od dana saznanja za disciplinsku povredu, a najkasnije dvanaest mjeseci od dana kada je povreda učinjena.

Prijava iz stava 1. ovog člana podnosi se u pismenom obliku i sadrži: ime i prezime studenta, opis i vrijeme izvršenja disciplinske povrede i dokaze koji ukazuju na izvršenje disciplinske povrede studenata.

Prijava za pokretanje disciplinskog postupka dostavlja se Disciplinskoj komisiji.

Član 12.

Urednu i osnovanu prijavu Disciplinska komisija dostavlja studentu uz poziv da se u roku od 8 dana od dana dostavljanja, pisanim putem izjasni o navodima iz prijave, tj. da dostavi odgovor na prijavu.

Član 13.

Nakon prijema odgovora studenta na disciplinsku prijavu, odnosno nakon isteka roka za davanje odgovora na prijavu, Disciplinska komisija može donijeti rješenje o obustavi disciplinskog postupka, ako utvrdi da ne postoji odgovornost studenta po podnesenoj prijavi.

Član 14.

Ukoliko ne donese rješenje o obustavi disciplinskog postupka Disciplinska komisija je dužna da u roku od 30 dana od podnošenja prijave za pokretanje disciplinskog postupka zakaže raspravu.

Predsjednik Disciplinske komisije određuje dan, čas i mjesto rasprave.

Na raspravu se poziva student protiv koga je pokrenut postupak, a po potrebi podnosilac prijave, svjedoci i vještaci.

Poziv se upućuje elektronskim putem i poštom, a ukoliko upućivanje poziva nije moguće poziv će se smatrati upućenim istekom roka od 8 dana od dana oglašavanja poziva na oglasnoj tabli Univerziteta.

Ukoliko je student uredno pozvan, a izostanak nije opravdao, rasprava se može održati u njegovoj odsutnosti.

Član 15.

Rasprava započinje čitanjem prijave za pokretanje postupka, nakon čega se student izjašnjava o disciplinskoj povredi koja mu se stavlja na teret.

Predsjednik Disciplinske komisije odlučuje koje će dokaze kojim redom izvesti.

Po završenom dokaznom postupku Komisija donosi odluku većinom glasova.

Član 16.

O radu i raspravi vodi se zapisnik, u koji se unose oni podaci za koje predsjednik smatra da su značajni za rješavanje disciplinske stvari.

Član 17.

Disciplinska komisija može donijeti jednu od sljedećih odluka:

1. Odbacuje se prijava;
2. Student se oslobađa odgovornosti;
3. Student se proglašava odgovornim.

Član 18.

Disciplinska prijava se odbacuje ukoliko je neuredna ili je izjavljena neblagovremeno.

Član 19.

Disciplinska komisija rješenjem odbija disciplinsku prijavu ukoliko u postupku utvrdi:

1. da povreda ne predstavlja disciplinsku povredu predviđenu ovim Pravilnikom;
2. ako nije dokazano da je student učinio disciplinsku povredu.

Član 20.

U rješenju kojim se student proglašava odgovornim Komisija će izreći:

1. za koju povredu se proglašava odgovornim i okolnosti koje čine obilježje povrede;
2. koja se mjera izriče.

Doneseno rješenje u pismenoj formi obavezno sadrži: uvod, izreku, obrazloženje i pouku o pravnom lijeku.

Rješenje se dostavlja studentu protiv kojeg je postupak vođen, studentskoj službi Univerziteta i objavljuje se na oglasnoj tabli Univerziteta.

Rješenje kojim se student za lakšu disciplinsku povredu izriče opomena kao disciplinska mjera, ne objavljuje se na oglasnoj tabli Univerziteta.

Član 21.

Protiv odluke Disciplinske komisije student može izjaviti žalbu Senatu Univerziteta.

Žalba se podnosi u roku od 8 dana od dana donošenja odluke.

Žalba ima suspenzivno djelovanje.

Član 22.

Senat Univerziteta svojom odlukom može:

1. Odbaciti žalbu, ako je neblagovremena;
2. Odbiti žalbu i potvrditi prvostepeno rješenje;
3. Uvažiti žalbu, ukinuti prvostepeno rješenje i vratiti predmet na ponovno odlučivanje;
4. Uvažiti žalbu i preinačiti prvostepeno rješenje.

Član 23.

Protiv drugostepene odluke donesene u disciplinskom postupku student može pokrenuti postupak pred nadležnim sudom u roku od 15 dana od dana donošenja drugostepene odluke.

VI MATERIJALNA ODGOVORNOST STUDENATA

Član 24.

Student koji namjerno ili iz krajnje nepažnje prouzrokuje štetu dužan je istu nadoknaditi.

Član 25.

Ako štetu prouzrokuje više studenata, svaki od njih je odgovoran za dio štete koja je prouzrokovana.

Ako se ne može za svakog studenta utvrditi dio štete koju je prouzrokovao, smatra se da su svi podjednako odgovorni i štetu nadoknađuju u jednakim dijelovima.

Ako je više studenata prouzrokovalo štetu krivičnim djelom s umišljajem, za štetu odgovaraju solidarno.

Član 26.

Visina štete se utvrđuje na osnovu cjenovnika ili knjigovodstvene vrijednosti, odnosno visinu štete i iznos nadoknade utvrđuje stručna komisija koju formira rektor Univerziteta ili na osnovu procjene štete osiguravajućeg društva kod kojeg je imovina Univerziteta osigurana.

Član 27.

U disciplinskom postupku u kojem je utvrđena disciplinska povreda nanošenja materijalne štete student se izriče disciplinska mjera i poziva se da nadoknadi štetu u visini utvrđenoj u postupku.

Ako student ne pristane nadoknaditi štetu, Disciplinska komisija donosi odluku kojom se student obavezuje da štetu nadoknadi u roku od 15 dana.

Ako student ne nadoknadi štetu u roku od dva mjeseca od dana kada je odluka postala konačna, rektor pokreće postupak za nadoknadu štete pred sudom.

VII ZAVRŠNE ODREDBE

Član 28.

Ovaj Pravilnik stupa na snagu osmog dana od dana objavljivanja na internet stranici Univerziteta.

Član 29.

Danom stupanja na snagu ovog Pravilnika prestaje da važi Pravilnik o disciplinskoj i odgovornosti studenata br. 1210/08/3-1 od 23.08.2008.

***Odluka Savjeta Univerziteta broj 1518/III-1 od 30. 09. 2025. godine**